

COMUNICATO n. 1946 del 29/06/2023

Traduzione in cimbrio

“Trentino no filter – di kultùr vor di”: dar naüge kontest vor di djungen

“Trentino no filter – di kultùr vor di”, a naügar konkors pitt prais vor kreatif djunge, iz khent vürgelekk da earst bòtta an fintzta atz 22 von prachant in di Sala Belli vodar autonome Provìntz vo Tria. Dar kontest khint augelekk zo geba vèrt dar raiche vodar trentinar kulturàl opfar durch di metode boda di djungen khennen pezzar: di sèlln von social media. Puam un diarnen von 18 sin afte 24 djar boda stian in Beleschlànt mang nemmen toal schikhante soi arbat durch TikTok, Instagram odar YouTube, arbat guat zo zoaga da trentinar kultùr asó azpesase seng seåndre. Di arbat mage innhaltn fotografian, video, karusèlln, un stories boda ågian in kulturàl schatz in aniaglan modo: von kunst plètz aftn tãntz, vodar stòrdja afte eventn, von teatro afte figùrn. Allz mocht khemmen geschikht vor atz 25 von snitt 2023. Di initziatìf iz vürgetrakk von asesór vor di istrutziõg, universitét un kultùr, Mirko Bisesti, boda hatt geschikht an video zo grüaza di prèss konferentz, von Dipartmént istrutziõg un kultùr, von Dianst vor di kulturàln arbatn vodar autonome Provìntz vo Tria. Dise emtar bartn soìn koordinàrt vodar Trentino Film Commission pittnãndar pitt Trentino Marketing. ’Z bartnda khemmen darkhennt sèks prais pitt gèlt sin atz, daz mearaste, 2.500 euro vor di earstn. Dar regolamént un form zo magase innschraim venntmen afte websait: trentinofilmcommission.it.

Dar kontest “Trentino no filter – di kultùr vor di” iz khent augelekk vor di djungen boda hãm lust zo djukhase in da trentinar kulturàl opfar machante social innhalt uantze un guat innzovãnga alle.

“Disar konkors – khütta dar asesór vor di istrutziõg, universitét un kultùr, Mirko Bisesti, - gitt an oportunitét in djungen djeneratziongen zo nütza soi kreativitétt durch post, stories odar video reel azpe a modo zo kontara di kultùr in Trentino. Daz earst vo allz iz vorsan in djungen azza khennen da kulturàl opfar un dena azzase machan khennen in åndarn o zoa azta berda nonét khennt ünsar realtétt magse khemmen zo khenna in alle soïne formen”. “Trentino no filter – geata vür zo khöda Bisesti – bill gem mearar vèrt dar kultùr vo haüt schupfante di djungen nãzosüacha un zo macha bizzan daz mearaste boma mage allz daz sèll boda mage khemmen gehozt kultùr in Trentino”.

Bia zo nemma toal iz khent khött punkt vor punkt vodar Alessandra Schiavuzzi, diridjénten von dianst vor di kulturàl arbatn vodar Provìntz un von Luca Ferrario direktor vodar Trentino Film Commission. “Pitt disan bãndo – hatta khött di Schiavuzzi – bölltma machan auvarkhemmen bazta seng di djungen saiz azpe laüt boda nützan di kultùr saiz apze söttane bodase machan, durch arbatn boda kontàrn di kulturàln opfarn un di initziatìvan vo disan summar”. “’Z bart soìn interesãnt – hatta kött anvétze dar Ferrario – seng bia di djungen soìn guat z’arbata pitt struméntn bosa khennen garècht zo kontara di idea bosa hãm se vodar kultùr”.

Ma sait nètt gepuntet atz bele struméntn zo nütza ma di innhalt anvétze mochan haltn kunt von sèll boda auzmacht hoatar dar regolamént, azpe “Feed Post vo Instagram pittnan karusèll daz mindarste pitt drai

fotografian geolokalizart un tag von bichtegarstn realtèt boda soìn khent inngenump” oder “video TikTok inspirational (max 20 sec in format 9:16) pitt trending musik vodar plattform un tag in bichtegarstn realtèt boda khemmen gezoaget in video”.

Aniaglana arbat darzuar, bart mochan hãm soìn copy zo maga soìn auzgèt azpe ’z hatt z’soina un vonan khurtzan schraib boda khütt ombrómm di iz khent gemacht.

Di toalnemmar bartn soìn inngetoalt in zboa kategorian: von 18 afte 20 djar un von 21 afte 24 djar. Vor aniaglana kategorì di komisiong bart machan soìn roatordnung. Di earstn in di zboa kategorian bartn gebinnenn 2.500 euro aniaglaz, di zboate bartn vângen 1.500 euro un an lestn di draite 500 euro. Berda hatt gebunnt khemmen khött atz 14 von herbestmånat 2023 in gelaichege tage bartnda khemmen gèt di prais.

Di vorsch zo nemma toal mang khemmen inngèt sin di 17.00 von vraitat atz 25 snitt 2023, lai auzvüllante in formulàr online boma vennt afte websait vodar Trentino Film Commission www.trentinofilmcommission.it.

Pildar un interviste von Prèss Àmt

Zo bizzasan merar: www.trentinofilmcommission.it

Dar asesor Mirko Bisesti

<https://www.youtube.com/watch?v=CEMPzjFv800&t=1s>

Di diridjènten Alessandra Schiavuzzi

https://www.youtube.com/watch?v=mV_kmJOFoK4&t=6s

Gezoaget

<https://www.youtube.com/watch?v=4i3DJ8LWWrs&t=1s>

Link vor in download

<https://wettransfer.com/downloads/09016bdddbc238541d522488a126ce5020230622131635/ab8949f349d0b10>

Übarsetzt von Schaltarle vor di zung von Toalkamou vodar Zimbar Hoachebene

(cdt)